



Broj/Broj: 03/1-50-14-7-10/12
Sarajevo/Sarajevo, 15. 2. 2012. godine

PREDMET: Informacija o radnoj posjeti Zajedničke komisije za odbranu i sigurnost BiH Parlamentu i institucijama odbrane Republike Poljske, Varšava, 29. i 30. 11. 2011.

veza, akt broj: 03/1,03/11-05-1-349/11

U skladu s Orijentacionim radnim planom Zajedničke komisije za odbranu i sigurnost BiH (u daljnjem tekstu: ZKOS), članovi ZKOS boravili su 29. i 30. 11. 2011. u radnoj posjeti Parlamentu i institucijama odbrane Republike Poljske.

Delegaciju ZKOS Parlamentarne skupštine BiH u ovoj bilateralnoj posjeti činili su: Dušanka Majkić, predsjedavajuća ZKOS, Beriz Belkić i Krunoslav Vrdoljak, članovi ZKOS, te Jovica Katić, stručni suradnik u ZKOS.

Cjelokupnu aktivnost u vezi s posjetom delegacije ZKOS pratili su predstavnici Ambasade BiH u Republici Poljskoj, predvođeni ambasadoricom Kovičkom Špirić.

Posjeta Parlamentu i institucijama odbrane Republike Poljske realizirana je uz podršku Misije OSCE-a u BiH.

29. 11. 2011.

Prvog dana radne posjete članovi ZKOS boravili su u radnoj posjeti Ministarstvu odbrane i Parlamentu Republike Poljske.

Prilikom posjete Ministarstvu odbrane Republike Poljske, članovi ZKOS održali su radni sastanak s državnim sekretarom za odbrambenu politiku Republike Poljske Zbigniewom Wlosowiczem. Tom prilikom razgovarano je o strukturi oružanih snaga, budžetskim izdvajanjima za sektor odbrane, kao i o iskustvima Poljske kada je u pitanju učešće u mirovnim misijama u inozemstvu, te naposljetku o provođenju parlamentarnog nadzora nad sektorom odbrane.

Predsjedavajuća ZKOS Dušanka Majkić zahvalila je gosp. Wlosowiczu na podršci koju je Poljska pružila Bosni i Hercegovini kada je odlučivano o dobivanju Akcionog plana za članstvo u NATO-u (MAP) za našu zemlju. Također je izrazila zahvalnost na dosadašnjem angažmanu predstavnika Oružanih snaga Poljske u EUFOR-ovoj Misiji ALTEA u BiH, kao i na pomoći koju je Republika Poljska pružila u formiranju Centra za obuku za mirovne operacije (PSOTC) u Butmiru.

Nakon toga, članovi Delegacije ZKOS PSBiH imali su nekoliko sastanaka u Sejmu i Senatu Parlamenta Republike Poljske.

Najprije su se sastali s vicemaršalom Sejma Cezary Grabarczykom, a zatim i s maršalom Senata Republike Poljske Bogdanom Borusewiczem. Tokom ovih sastanaka razgovarano je o napretku BiH na njenom putu ka evropskim i evroatlantskim integracijama, a naročito o aktuelnim političkim pitanjima koja se odnose na uslove koje BiH mora ispuniti kada je u pitanju priključenje NATO-u. Rukovodioci domova poljskog parlamenta izrazili su nadu da će Bosna i Hercegovina uskoro dobiti vlast na državnom nivou, te da će nakon formiranja Vijeća ministara BiH ubrzano krenuti ka ispunjavanju uslova koji stoje pred njom, navodeći pri tome iskustva Poljske u njenim integracijama u EU i NATO, te naročito prezentirajući sadašnja iskustva Republike Poljske, u trenutku kada predsjedava Evropskom unijom.

Članovi Zajedničke komisije razgovarali su i s predsjedavajućim Komisije narodne odbrane Senata Republike Poljske senatorom Wladislawom Ortylom i članom Komisije Manejem Gruskim, kao i s članom Komisije narodne odbrane Sejma Andrejem Rozenekom. Tom prilikom razmijenjena su iskustva ovih komisija koja se odnose na parlamentarni nadzor sektora odbrane, naročito po pitanjima budžeta i javnih nabavki u Oružanim snagama, te učešća jedinica u mirovnim misijama u svijetu, zatim demokratskog nadzora nad sektorom sigurnosti i policijskim agencijama koje ulaze u njegov sastav, kao i na pitanja donošenja odluka u komisijama i usvajanja pojedinih zakona.

Na kraju prvog radnog dana članovi Komisije sastali su sa zamjenikom direktora Biroa za međunarodne poslove Sejma Republike Poljske Adamom Dudzicem i direktorom Biroa za međunarodne poslove Senata Leszekom Kieniewiczem, te predstavnikom Komisije za vanjske poslove Senata senatorom Marekom Borowskim. Razgovarano je o iskustvima Republike Poljske kada su u pitanju usaglašavanja nacionalnih zakona sa zakonodavstvom Evropske unije.

30. 11. 2011.

Drugi dan radne posjete članovi Zajedničke komisije za odbranu i sigurnost BiH posjetili su Generalštab Vojske Republike Poljske, gdje su održali zajednički sastanak s njegovim načelnikom generalom Mieczysławom Cieniuchom. Tokom ovog sastanka članovima Komisije prezentiran je proces transformacije Oružanih snaga Republike Poljske u posljednje

dvije decenije. Poseban akcenat stavljen je na pitanja kao što su budžetiranje sektora odbrane, zatim pitanja vezana za personal u Oružanim snagama, napredovanje oficira i realizacija konkursa za prijem profesionalnih vojnih lica, kao i rješavanje viška municije i minsko-eksplozivnih sredstava, učešće pripadnika Oružanih snaga Poljske u mirovnim misijama u inozemstvu, gdje je naročito apostrofirano njihovo učešće u okviru EUFOR-ove misije ALTEA u BiH.

Drugi dio drugog radnog dana delegacija Zajedničke komisije boravila je u posjeti Operativnoj komandi Vojske Republike Poljske, gdje su održali sastanak s general-pukovnikom Edwardom Gruszkom, načelnikom Operativne komande Vojske Republike Poljske, koji je 1999. godine obavljao dužnost zamjenika komandanta Nordijsko-poljske brigade Misije SFOR-a u Bosni i Hercegovini. Tokom ovog sastanka članovima Komisije prezentirana je uloga Operative komande Oružanih snaga Republike Poljske, te u okviru toga predstavljene i aktivnosti poljskog kontingenta koji učestvuje u mirovnoj misiji Evropske unije u BiH, koji broji ukupno 50 učesnika. Također je prezentiran i historijat učešća poljskih brigada u mirovnim misijama u BiH u periodu od 1992. do danas, te prezentirani njihovi uspjesi u radu tokom ovog perioda.

Članovi Zajedničke komisije zahvalili su se rukovodstvu Operativne komande Oružanih snaga Republike Poljske na njihovom dosadašnjem angažmanu u mirovnim misijama u BiH, izražavajući uvjerenje da će u budućnosti ukupna sigurnosna situacija u BiH zahtijevati sve manji angažman predstavnika oružanih snaga zemalja EU u Bosni i Hercegovini.

**PREDSJEDAVAJUĆA
ZAJEDNIČKE KOMISIJE
Dušanka Majkić**

Dostavljeno:

- naslovu
- a/a